

明

史

明史卷三百七十九

忠義傳

忠義四

阮之鈿字實甫桐城人為諸生優才行崇禎中有保舉之詔同邑諭德劉若宰以之鈿應授穀城知縣十一年正月之鈿未至張獻忠襲陷其城擣之以求撫總理熊文燦許之處其衆數萬於四郊居民洶洶欲竄之鈿至盡心調劑民獲少安乃上疏言微臣辨賊有心受事無地獻忠虎踞邑城其謀叵測所要求之地實兵餉取道之咽喉秦蜀交會之脈絡今皆為所據而奸民甘心效用善良悉為迫脅臣守土牧民之

官至無土可守無民可牧庫藏殫虛民產被奪更無
賦可徵名雖縣官實贅員爾聞今廟堂之上專主撫
議臣愚妄謂撫勒二策可合言未可分言致損國威
而挫士氣也時不能用賊衆始稍相安然習於為盜
後漸出野外行劫之鈿執之以告其營將始猶少寘
之法已而大肆之鈿往告皆不應曰官司不給鈿爾
得鈿自止由是村民徙亡殆盡遂掠及闕閭稍拒輒
挺刃相向日有死者一城大驚監軍僉事張大經奉
文燦令來鎮撫亦不能禁明年獻忠反形漸萌之鈿
往說之曰將軍始所為甚悖今幸得為王臣當從軍

立功垂名竹帛且不見劉將軍國能乎天子手詔進
官厚資金帛此亦誠之效也將軍若疑中朝有異論
者之鈿請以百口保於朝何嫌何疑而復懷他志哉
獻忠素銜之鈿至是惡言極罵之之鈿憂憤成疾題
數語於壁自誓以死遂不視事至五月獻忠果反劫
庫縱囚縱其城之鈿即仰藥未絕獻忠遣使索印堅
不予賊遂殺之旋縱火焚公署骸骨為燼而大經為
賊劫去不能死迨瑪瑙山戰敗偕賊將曹威等出降
士論醜之之鈿後贈尚寶少卿

鄭景春字和滿江都人舉於鄉署鹽城教諭縣令貪

唐貞歲饑民洶洶運亂賴景春撫輯獲解散坐事罷
歸起陝西苑馬寺萬安監錄事量移黃州府昭磨攝
黃安縣事甫三日群賊掩至堅守八日夜始解去崇
禎十一年擢房縣知縣十一月賊寇羅汝才率其黨
九營之衆請降於熊文燦文燦受之汝才猶豫未決
景春匹馬入其營偕汝才及白貴黑雲祥軟血盟汝
才乃詣軍門降分其諸營於竹谿保康上津而自與
貴雲祥居房縣之野當是時鄖陽諸屬邑屢遭大寇
城郭為墟獨房以景春善拊循召民收保山城粗完
至是夫衆襁處居民惴惴不自保景春憂甚與主簿

朱邦聞守備楊道選內修守具外輯睦諸營暫護安堵明年五月張獻忠反穀城使使約汝才同反景春子諸生鳴鸞力敵萬夫謂其父曰吾城當賊衝而竄卒止二百城何以守乃探甲詣汝才曰若不念香火盟乎毋從亂汝才佯諾鳴鸞知其巨測歸與道選授兵登陴而獻忠所遣前鋒已至擊斬其將上天龍遣使縋城乞援於文燦凡十四往不報已而獻忠騎大至守者見獻忠兵白幟汝才兵亦幟俄白與赤雜環城力攻貴雲祥策馬呼曰但以城讓我保無他也獻忠遂以張大經檄諭降景春怒大罵碎之鳴鸞且守

且戰閱五日，擊賊多死，賊負板穴城，城將崩。鳴鸞燕
油灌之，斃。又擊傷獻忠左足，殺其所愛善馬。軍民益
奮，乃用間入賊壘，陰識獻忠所卧帳，將設計襲擒之。
指揮張三錫宿與賊通，時守北門。汝才之舊屯在其
外，二十九日，汝才遣人揚灰而譟曰：「南城陷矣。」守者
驚潰。三錫遂啓門，揖汝才入道，還巷戰，死。大經欲景
春分其惡，使汝才說降，怒不荅。汝才問庫藏儲蓄，安
在。叱曰：「死賊庫藏有物。」城豈為汝陷？賊怒殺一典史。
一守備，恐之，猶不屈。與鳴鸞俱被殺。僕陳宜亦死之。
邦聞及其家人，並不屈死。事聞，贈尚寶少卿，建祠奉

祀道遠等亦加贈恤已帝召見輔臣賀進聖脩述其
死事狀改贈太僕少卿三錫後為官軍所獲磔死

武大烈臨潼人舉天啓七年鄉試崇禎十二年授永
寧知縣縣有萬安郡王王府人頗恣橫奸人窟穴其
中莫敢何問大烈一繩以法流寇時掠境上城守之
計甚設明年十二月二十一日李自成自南陽陷宜
陽殺知縣唐啓泰遂移兵攻永寧先是邑人張論為
四川巡撫罷歸佐有司捍禦數却賊論沒子吏部郎
馬延繼之亦數有功至是獄囚牛可敷等勾賊都司
馮有義棄城遁大烈偕馬延及其從父順天府治中

讚因守三日賊環攻以二十七日夜半登城執大烈
自成以同鄉故欲活之大烈不屈索印又不予以燔
灼以死昂延匿智井免讚及於國學生祚延死之主
簿魏國輔教諭任維清守脩王正己百戶孫世英並
不屈死萬安王采鏗亦被害賊即移攻偃師城中空
虛不能守一日而陷知縣徐日泰大罵不屈為賊幣
割迄死罵不絕聲啓泰掖縣人日泰金谿人並起家
鄉舉明年正月賊犯寶豐以十二日陷其城知縣朱
由棫死焉未幾陷密縣知縣朱敏汀及在籍太僕卿
魏持衡舉人馬體健亦死之由棫益府鎮國將軍常

漱子敏汀亦宗室並由貢生敏汀妻張氏一女一孫
及臧獲數人俱死與由械並贈按察僉事

來秉衡洛陽人天啓四年舉於鄉未仕崇禎十四年
正月李自成陷洛陽秉衡為賊將劉宗敏所執令其
易服欲官之秉衡不可羈之商郊民舍顧見其友謂
之曰賊勒我以官我義不受辱但恨老母在堂幼子
在祿死不瞑目爾賊聞燒鐵索加其脛終不從遂被
殺并殺其母劉氏妻吳氏及其幼兒與秉衡同時殉
難者有劉芳奕常克念郭顯星韓金聲王明楊萃荀
良翰諸人芳奕慷慨優智畧與秉衡同舉於鄉為昌

樂知縣有政聲解官歸值歲大歉人相食傾橐濟之
賊氛逼集縣中義士為千城社佐有司保障及悍卒
內叛城忽陷縊死西城戍樓克念舉進士為平陽推
官寬厚簡重政持大体聽斷無冤民至是旋里遂被
難顯星舉於鄉為許州學正遷翰林院待詔未赴抗
節死金聲明皆進士金聲官邯鄲知縣明官行人華
良翰皆舉人萃官辰州府知府良翰未仕並以城破
遇害

錢祚徵字錫吉掖縣人崇禎中以乙榜歷官汝州知
州汝為流寇往果孔道土寇又竊據山中祚徵欲先

除之募壯士千人訓練而遣人為好言招撫且白晝
開城門以示之懼寇果不疑祚微以夜半取間道直
搗其巢寇方縱酒陸博遂大敗令民千家立一大寨
有急鳴鉦輒相救援寇勢衰息其寇魯加勤遂出降
十四年正月李自成驟率眾來寇祚微擐甲乘城誓
眾固守身中流矢恐懈眾心督厲益力二月四日大
風霾砲炸樓焚城遂陷罵賊而死汝人立廟祀之
張克儉字禹型屯留人崇禎四年進士授輝縣知縣
勤於其職著廉能聲時群盜彌河北以六年二月祀
武安守脩曹鳴鶚戰死遂祀輝縣克儉棄城固守賊

不能下屯百泉書院三日而去久之入為兵部主事
有薦其才者召對稱旨十二年十月擢湖廣按察僉
事監鄖襄諸軍督師楊嗣昌鎮襄陽命克儉繕城池
脩甲仗儲糗糧諸務畢舉嗣昌深倚之明年春張獻
忠敗於瑪瑙山其秋羅汝才敗於豐邑坪賊魁小秦
王混世王過天星等皆降嗣昌處之房竹山中命克
儉安輯諸賊得免死牌莫肯解散自擇便地連營數
百里時河南北大饑流民就食襄漢者日數萬降卒
因之多闌入克儉深憂之上書嗣昌曰襄陽自古要
區本朝堯鑄獻陵眎昔屯重近兩河饑民雲集新舊

降丁逼處其間一夫呌呼即足致亂况秦兵以張武
之變西歸鄖房軍府粗立降營基置奚啻放虎自衛
紫漢西興初無重門之倚何恃而不恐嗣昌不以為
意報曰昔高仁厚六日降賊百萬迄擒并能監軍何
怯耶及嗣昌入蜀委克儉以留務九月錄破賊功加
右叅議監軍如故未幾以本官移守下川南道鄖陽
巡撫袁繼咸奏留之十四年二月擢右僉都御史巡撫
河南未聞命獻忠假督府軍符賺襄陽城克儉不能
辨賊遂入夜分賊從中起肆殺掠焚襄王府克儉倉
皇奔救為賊所執大罵死襄陽推官鄭曰廣攝襄陽

縣事李大覺游擊黎民安死焉曰廣番禺人崇禎十
年進士居官有節操奉檄挾軍儲於荊州甫還任而
難作急勒吏卒登城捍禦中刃死妻妾及二子二女
俱遇害大覺字覺之金谿人由鄉舉知穀城兼署襄
陽縣聞變繫印於肘縊死堂上民安大覺全縣人城
中火起率所部千餘人搏戰矢盡被縛抗罵死獨知
府王承曾遁免初獻忠敗於瑪瑙山其妻教氏高氏
被獲他將搜山又獲其軍師潘獨鰲皆繫襄陽獄承
曾年少輕佻悅獻忠二妻色每夕託問賊中情形與
之笑語獄吏又多納賊金禁防盡弛獨鰲等得以脫

桎梏忽宴飲為樂嗣昌以獻忠飄忽投牒戒之承曾
笑曰是詎能飛至耶及是獨熬果從獄中起承曾率
衆奪門走事聞命遽治承曾夏邑人時河南亦大亂
久逮不至未知所終

盛以恒瑯閩衛人崇禎十年由乙榜為商城知縣視
事月餘流寇突至禦却之自是拮据戎備力為保障
明年張獻忠陷襄陽鄰境震懼時以恒已遷開封府
同知將行士民邀之共守乃晝夜乘城與里居縉紳
楊所修洪胤衛馬剛中段增輝倣備不懈無何賊衆
掩至適雨雪守陴者凍餒不能戰以恒擐甲執弓督

家衆射賊計七人墜馬賊怒併力合攻矢中右額以
恒猶累瘡拒敵賊俄登北城家衆巷戰死且盡乃被
執罵賊不屈為賊支解孫覺及典史呂維顯教諭曹
維禎皆遇害時二月二十有八日也爾衡萬曆中舉
進士歷官陽和兵備副使分守北門力戰被難剛中
字九如父之圖吏部郎中剛中舉崇禎七年進士授
大同知縣有政聲行取入都天子臨軒策試授翰林
檢討乞假歸城將陷或勸其出避毅然曰吾家世受
國恩可臨難苟免耶幸而全國之福不然惟與同盡
爾及賊入大罵被磔死增輝字含素為諸生以勞行

稱朝廷下保舉之令有以增輝薦者增輝不樂為吏
擬除教授未謁選遇變亦罵賊死所修自有傳賊既
陷商城即疾驅犯信陽有奸人為內應城即陷知州
高孝誌訓導李逢旭程所聞鄉紳張映宿死之其陷
光山也典史魏光遠亦死之映宿舉進士官靜海知
縣罷歸至是及於難事聞所司請贈以恒光祿少卿
孝誌太僕少卿未報十五年七月帝下詔曰北州縣
有司不設守備賊至即陷原與衝鋒陷陣持久力誅
者殊科若乘援天啓間例優予贈廕何由旌勸勞臣
自今五品以下止贈監司四品及方面始贈京卿著

為令乃贈以恒河南按察司副使者誌布政司右叅議維顯等贈恤有差先是天啓中州縣長吏殉難者率贈京卿廕錦衣世職賜祭葬有司建祠崇禎初改廕國子生俾之出仕贈京卿猶如故至是始改贈外僚云

徐世淳字中明嘉興人侍郎必達子也崇禎中由鄉舉署永嘉教諭擢重慶府推官禁誅求省厠傳惠政及民常監軍討資簡諸寇道路往還民皆安堵十三年遷隨州知州隨破壞之餘民氣蕭索世淳以十月蒞任知寇必復至集士民誓於閭杜繆祠要以為守

繕城濬濠拓羊馬塙具砲石練壯士邨饑寒平糶償
會歲大荒士多就食鵠厥嘆曰可使士以餒故失禮
乎分粟賑之士皆感悅潰兵過隨索餉勢甚洶洶世
淳授兵登陴而已單騎入其營執帥手曰軍食不供
有司罪也殺我足矣請械我以見督師帥氣奪飲衆
去明年二月張獻忠陷襄陽三月遂來犯世淳寢食
南城譙樓曉夜督衆固守而使使告急於巡撫巡撫
宋一鶴遣兵來援監司守承天者勒之自助援絕力
窮四月二十五日賊急攻南城潛兵隳北城以入世
淳命子肇探埋印解後東塙下而勒馬巷戰矢貫頤

耳鼻橫斷遂墜馬為亂刃砍死肇標奔赴且哭且罵賊將殺之疾呼州人告以埋印處乃死世淳妾趙氏王氏及戒獲十八人皆死而趙氏死尤烈當事上其狀贈太僕少卿建祠以肇標附隨自十年正月被陷知州王燾殉難及是再陷至七月復陷判官余瑀死焉三陷之後城中幾無子遺閭井為墟

顏日愉字陽華上虞人萬曆中舉於鄉崇禎初除葉縣知縣有惠政而不為上官所喜劾罷之部民詣闕訟冤者數百人乃獲叙用後為靜寧知州敬禮賢士政務便民會猺賊作亂馳請固鎮五道兵合勦而先

率敢死士數人招諭之賊弛備遂遣精卒直搗其營
賊倉皇失措潰敗斬首數百級黎明五道兵繼至後
大破之遷開封府同知嘗攝渾池滎陽二縣事荒殘
之餘撫恤瘡痍政績甚著滎陽為立生祠上官以南
陽要衝會舉日愉為知府至則繕甲製器治城濠儲
糗糒簡壯士人心稍固十四年正月李自成陷洛陽
二月張獻忠陷襄陽南陽震恐日愉防禦益嚴五月
七日漏未盡賊果至即令百數十人冒雨登城日愉
督將士奮擊士民群助之殺城上賊幾盡餘賊遂引
退城獲全而日愉手中一矢頭項被二刃遽隕於城

頭圍城莫不哀悼贈太僕寺卿賊既不得志於南陽
遂縱兵掠旁近州縣九月大破傅宗龍軍於項城勢
益張以十一月再圍南陽攻陷之唐王被難總兵官猛如
虎劉光祚泰議艾毓初死焉毓初字孩如米脂人戶
部侍郎希淳曾孫也舉崇禎四年進士授內鄉知縣
毓初生長邊陲知兵習戰六年冬流寇來犯毓初集
衆固守埋大砲名滾地龍者於城外而城中引線燃
之砲發賊死無算遂解去內鄉與鄰邑浙川多深山
邃谷群盜窟穴其中居民慄慄自毓初蒞任一縣恃
以少安明年冬唐王聿鍵上言凡官司詣親王新封

郡早晚必謁。凡祖制也。今臣封內如毓初及鄧州桐
栢鎮平諸長吏。但謁監司郡守。不謁親王。蔑棄祖制。
帝怒。逮毓初等下法司。而勅禮官重申典制。禮部侍
郎陳子壯疏救。不聽。已而王被譴。廷臣多知毓初才
獲補官。累遷至右叅議。分守南陽。日愉之。却賊。毓初
亦有功。至是自成用宋獻策計。欲取南陽。以圖閩中。
獲率大衆來寇。毓初偕如虎兆祚等分門堅守。賊已
攻入南門。會總督楊文岳援軍至。賊即引退。及文岳
兵去。賊復圍攻之。食盡。援絕。毓初題詩城樓。遂自縊。
南陽知縣姚運熙主簿門迎恩訓導楊氣開亦死之。

明年十月自成再陷南陽知府丘懋素罵賊不屈闔門被害

潘弘字若稚淮安山陽人由貢生歷定遠訓導海門教諭崇禎十三年遷舞陽知縣時流寇披猖土寇亦乘間竊發弘偕武將討擊屢敗之明年十一月李自成羅汝才既陷南陽遂縱兵覆所屬州縣於是舞陽及鄧州鎮平內鄉泌陽新野皆失守弘知寇至諭士民共拒諸生景長舒等慮賊屠城請弘委曲紓禍弘叱曰吾為守土吏當與土存亡寧能降賊求活耶賊薄城發砲擊之多斃有小校善射發必命中賊稍却

而諸生潛遣人約降賊復至弘作告先聖文自誓必
死諸生乃開門納賊縛弘以獻賊索印脅降弘怒罵
不屈賊射斷其手足解以死于澄瀾痛憤號哭投井
死先教日鄧州陷知州劉振世吏目李國璽死之千
戶余承庵李錫諸生丁一統張五美王鍾王子章海寔
傅彥亦死焉鎮平知縣鍾其碩成縣人城陷被繫罵
賊死南昌龔新知內鄉四川韓醇知新野並不屈死
臨晉姚昌祚代王士昌知泌陽甫教月邁變手戟數
賊力屈死典史雷晉暹率捕卒禦賊力戰死先是十
年二月土寇合張獻忠犯鄧州知州孫澤盛偕同知

薛應齡督兵出戰死之是年五月獻忠破信陽獲左良玉軍旗幟假之以趨泌陽以初六日夜抵城下乘天大雨攀堞而登知縣王士昌懷印端坐賊至被縛謾罵死至是鄧州泌陽凡再陷云士昌雲南寧州人起家鄉舉

陳預抱舞陽人母段氏早寡撫預抱及其弟預養預懷皆為諸生三子亦力田好學善承母志崇禎十四年流寇陷舞陽其母先赴井三子從之預抱婦黃氏携其子默通預養婦馬氏携其子默恒默言亦從之三世九人一時盡節天下多之時內鄉許宣及弟

案宮皆諸生慷慨好義賊陷鄧州宣兄弟結里黨壯
士直入其城擒偽官堅守許家寨賊怒攻破之寨從
母常氏先投井死宣與宮皆嘗賊被殺宮妻鍾氏家
妻陳氏並自經其妹亦嘗賊被殺時稱許氏七烈賊
之攻偃師也諸生張輒粹父子佐有司城守及賊入
城大罵被害賊并害其一子妻蘭氏與三女二孫悉
赴井死武同芳者亦偃師諸生賊殺其母同芳噴血
大詬交解而死其同邑諸生劉芳名劉芳世蘭捉粹
擊賊不勝死喬于昆投水死蘭完齷王光顯喬國屏
王邦紀蘭相裔張一鷺張一鵬牛一元皆罵賊死芳

名完顏妻皆張氏與邦紀妻高氏並從死一鷺一鵬
之父亦罵賊死諸生許曰琮者唐縣人早喪父及母
歿廬墓三載城破遁居南山賊徵之不出脅以死終
不屈錮其背曰誓不從賊遂嘔血而卒其他州縣諸
生遭寇殉義者不可勝志姑志其最著者數人云
劉振之字而強慈谿人性剛方敦學行以名教自持
鄉人莫不嚴重之崇禎三年舉於鄉署東陽教諭力
崇師道束修之饋無所入為一時學官稱首用薦遷
鄆陵知縣政務利民威愛兼濟時將領驕恣有過鄆
陵索餉者振之不應其人怒令部卒縛之去父老呼

號奔救欽賢以犒始釋歸十四年十二月李自城陷
許州殺知州王應翼自許以南無堅城有奸人素通
賊倡言城小不可守宜速降振之怒厲聲叱退之集
吏民守禦無何賊大至城陷振之走謁先師秉笏端
坐堂上賊索印不予縛置雪中三日夜振之罵不絕
口賊亂刃交下乃死初振之書一小簡藏之篋中每
歲元旦取視輒加紙封其上及是家人發篋乃不貪
財不好色不畏死三語也其立志堅定如此贈光祿
寺丞有典史杜邦舉者富平人方振之之叱奸人也
邦舉即曰公言是城存與存城亡與亡人臣大義豈

可偷生以辱祖宗哉乃與振之協力拒守及許州被
屠衆心益懼有緹城遁者邦舉捕得立斬之衆為股
栗城既陷被執自成欲降之大罵曰朝廷臣子豈為
賊用自成怒抉其舌邦舉啖血噴之仍大罵遂與振
之並遇害時開封屬城多陷其全時殉難者有費魯
謀魏令望柴薦裡楊一鵬劉孔暉王化行姚文衡諸
人曾謀鉛山人少師宏之裔也由鄉舉知通許蒞官
纔四旬賊猝至曾謀欲守念力弱乃召其父老告之
曰我死若輩以城降可免屠戮端笏北面再拜抱印
投井死令望字子野武鄉人舉進士授商丘知縣調

太康賊至固守不下賊怒攻破之屠其城令望閨門
自焚死薦裡江山人由鄉舉知涪川賊陷其城大罵
死一鵬河津人天性孝友崇禎九年舉於鄉為尉氏
知縣惠民愛士甫數月政聲四起賊至堅守及力屈
城破罵賊死孔暉邵陽人舉天啓九年鄉試為新鄭
知縣大寇臨城固守不能支遂死之士民祀之子產祠
化行知商水城陷被殺代者姚文衡蒞任數月賊復
至攜印赴井死

李秉雲高陽人舉於鄉崇禎中授浮山知縣廉毅有
為流賊數萬來寇秉雲一矢斃其魁衆遂遁累遷山

西按察僉事十四年七月以才調河南大梁道駐禹
州時歲沴饑益以寇盜四野蕭然乘雲撫輯盡力其
年十二月李自成連陷鄆陵陳留諸縣遂寇禹州乘
雲太集士民激以忠義誓死固守賊多斃於砲以十
萬騎來益攀堞而登乘雲被執抑使跪叱曰我堂堂
監司肯屈膝於賊即怒碎而杖之大罵不絕聲賊縛
諸樹攢射之罵不已斷其舌亂刃交下而死贈光祿
寺卿州先有徽王府嘉靖時王載堦有罪爵絕至是
延津等五郡王並被難同時任棟永壽人由貢生為
萊州府通判崇禎四年二月李九成耿仲明等陷登

州遂乘勢來攻棟佐知府朱萬年拮据守具深著勞
績已而萬年與巡撫謝璉出城撫賊為賊所執城中
益危棟偕同知寇化掖縣知縣洪恩炤助大帥楊御
蕃拒守勞績益著至八月圍始解論功進秩賜金累
遷保定監軍僉事十四年從總督楊文岳南征有鳴
臯鎮之捷尋與總兵虎大威破賊於平峪七月再破
賊於鄧州明年正月從解開封之圍二月戰於郕城
大捷後從援開封會左良玉大潰於朱仙鎮賊來追
棟與副將姜名武力戰並沒於陣有余爵者禹州人崇
禎元年進士授撫寧知縣果敢有吏才為巡撫楊嗣

昌所知以憂去起官章丘入為兵部職方主事罷歸
嗣昌出督師奏請以故官叅謀軍事爵至嗣昌甚倚
之軍務多與籌畫嗣昌入蜀命與張克儉全守襄陽
及城陷爵脫走嗣昌沒從督師丁啓睿於河南鄧州
之捷爵與有功十五年開封圍急爵監左良玉軍往
援戰敗被執罵賊死乘雲贈光祿卿棟太僕卿爵太
僕少卿

閔永傑字人孟鞏昌衛人世官百戶至永傑好讀書
每遇忠義事輒書之於壁狀貌奇偉酷類世俗所繪
閔壯繆像崇禎四年會試入都與儕輩遊壯繆祠有

道士前請姓氏衆問故曰昨夢神告吾後人當有登
第者將來必繼我忠義可語之永傑愕然頗自喜已
果得第為開封府推官強直不阿攝府事興利去患
無微不至民畏愛之以憂歸起官紹興入為武選主
事督師楊嗣昌薦其才請用之軍前乃擢睢陳兵備
僉事駐陳州陳故賊衝歲被蹂躪永傑至日為儆備
常如賊至及賊漸逼遣其妻陳氏歸妻願俱死永傑
曰我死分也妻子為保可乎我子猶幼汝歸為我養
子續先人祀我無憾矣妻乃訣去十五年二月李自
成以數十萬衆來攻永傑與知州侯君擢卿薦紳崔

泌之等率士民分堞死守賊遣死說降斬其顯懸之
城上賊怒攻破之未傑格殺數賊身中數刃大罵而
死君摧字際明成安人起家乙榜城圍時身先士卒
運木石擊賊濠皆滿後被縛罵不絕口死泌之鹿邑
人家陳州舉進士授雒縣知縣調清苑性豪宕不羈
在官多所建著崇禎初前知清苑者黃宗昌入為御
史常疏劾周延儒延儒矚保定知府史躬盛按其遺事
躬盛以屬泌之泌之曰可殺人以媚人乎躬盛怒時
泌之已遷戶部主事躬盛謂其侵隱錢穀三萬不聽
行會御史行部至泌之突前與躬盛角御史以聞下

獄遣戍久之釋還至是遭變用鉄杖斃賊數人自刎
死舉人王受爵亦奮勇擊殺數賊大罵死有冀作梅
者年十七父母俱亡殯於舍賊入火民居作梅跪柩
前焚死久之贈永傑光祿寺卿君擢布政司右叅議
必之復故官受爵宛平知縣

張維世太康人萬曆四十四年進士歷官平陽知府
公正廉潔大得民和絳州有惡黨數十人盡寘之法
署內舊蓄荷池注以樊家河水維世曰得毋妨民灌
溉耶即止之就遷按察副使分巡其地崇禎九年五
月累官右僉都御史代陳新甲巡撫宣府七月

大清兵越天壽山入昌平山後地為宣府所轄維世
視事甫旬日竟坐失防削籍遣戍己而釋還十五年
二月李自成既陷睢州遂犯太康維世佐知縣魏令
望竭力拒守賊勢盛城遂陷抗節而死時中州地失
亡最多其縉紳死難者亦多有十三年登封土寇李
際遇因歲饑倡亂旬日間聚衆數萬肆行劫掠前鳳
陽府通判姚若時致仕居魯莊村賊來犯被執誘之
降大罵而死族諸生不顯亦死之若時子諸生城思
報父仇數請兵討賊賊執之於路亦抗罵被殺陝州
趙良棟仕為蓬萊教諭罷歸寓居渾池寇陷渾城父

子挺身罵賊死其媳若孫亦赴井以殉陝州之陷前
平定知州梁可棟居憂在籍亦大罵而死仝里蕭大
成以淮安府同知家居投井死龜陷商水前臨汾知縣
張節抗賊死其陷西平也前懷仁知縣楊士英死之
子婦王氏從死息縣陷賊召前項城教諭王多福欲
官之堅拒不赴賊逼之投繯而死洛陽阮泰仕為廣
靈知縣解職歸十七年聞北都之變不食死妻朱氏
從之楊汝經睢州人崇禎十年進士授戶部主事著
廉能聲擢井陘兵備僉事十七年正月朝中聞甘肅
陷趙撫林瑞日殉難起拜汝經右僉都御史代之行

次林縣聞都城亦陷將赴南京至東明率壯士百餘騎還討林縣偽官抵屯子遇賊戰敗執至林縣偽官釋其縛說之降不從又遣一婦紳來說汝經正色責之其人慚嘆偽官斃之獄

主世琇字崑良保定人崇禎十年進士授歸德府推官遷工部主事十五年二月李自成既陷陳州遂乘勝犯歸德歸德素不置兵世琇時已辨裝將行僚屬邀與共守慨然曰人臣義不辭難久官其地臨難而去是非誼也遂與同知顏則孔經歷徐一源商丘知縣梁以樟教諭夏世英里居尚書周士樸等誓衆堅

守賊攻圍七日總督侯恂家商立其子舉入方夏率
家衆斬關出奔殺傷守者數十人衆遂亂賊乘之以
入世琇則孔革遇害則孔女聞之即自縊一源分守
北城殺賊最多城陷猶督衆巷戰罵賊死以樟中賊
刃久而獲妻張氏及子女僕從皆死世英見賊入
持刀罵賊死於明倫堂妻石氏亦自刎一時仝死者
工部郎中沈誠主事朱國慶文華殿中書侯忻廣西
知府沈仔威縣知縣張儒及舉人徐作霖吳伯季周
吉美等六人官生沈似侯峻等三人貢生侯恒沈誠
周士貴等八人國學生侯棕沈佃等四人諸生吳伯裔

張渭劉伯愚等一百十餘人作霖伯楷伯裔渭伯愚
皆郡中名士尤有聲則孔沂州人一源海鹽人世英
祥符人士撲自有傳賊既陷歸德尋陷鹿邑知縣紀
懋勛死之又陷虞城署縣事主簿孔亮亦死焉

許永禧曲沃人崇禎十三年由舉人為上蔡知縣多
惠政性耿介不以嘲笑假人十五年春李自成將果
犯先遣數騎抵城下脅降永禧即督吏民憑城拒守
賊大呼曰今日不迎降明日即屠爾城衆懼以告永
禧嘆曰賊勢被猖獗九邑豈能自保吾惟一死盡職
而已衆皆泣明日賊果大至守者禦潰永禧具袍笏

北而再拜據案秉燭端坐頃之賊入遂自剄全時高
平垣繁時人崇禎十二年由恩貢生除西平知縣為
人孤鯁以清慎得民十五年二月流寇陷城被執不
屈死劉英貴州人由貢生崇禎十三年為遂平知縣
十五年賊來攻城英誓衆死守已而城陷罵賊死有
宦篆者膠州人由任子為汝寧府通判上蔡既陷往
署其縣事城中民舍盡燬篆廣招流亡衆觀望不敢
入會左良玉駐城南其兵淫掠無虛日衆始入城依
篆村民遭難來懇篆即入良玉營責以大義奪還之
民獲完家室者甚多悍卒或方刀相向篆即袒腹當

之卒亦不敢害是年冬汝寧陷賊黨賀一龍掠池上
蔡訛傳土寇剽劫集出禦之陷陣死士民莫不哀悼
李貞佐字無欲安邑人早有志操受業同里曹于汴
之門以學行著天啓七年舉於鄉崇禎中除邳縣知
縣初土寇楊同錦聚衆作亂謀攻城有奸人爲內應
賊即入大肆焚掠而據城乞撫總兵官王紀禹副將
劉國能率師來討同錦中矢幾斃會監司魏公韓檄
汝州吏目顧王家受賊降二將之兵遂罷未幾公韓
去巡撫李仙風令開封趙同知察狀同知納其厚賕
力言賊患歟可用牒授都司守備者至三十餘人排

衣黃蓋縱橫道途而劫掠如故知縣邵子灼不能禁
里居通判李之綸密陳其狀仙風以詰同知同知懼
即令賊掩殺之綸十四年二月李自成來寇同錦郊
迎言願守郊當一面俟取開封即納土自成怒殺之
并殺可灼而去貞佐以是年四月蒞任同錦餘黨猶
聚焦家寨貞佐簡練鄉兵括賊財以充餉雖軍事旁
午時出近郊勞耕者以酒食月必課士語之曰四民
復業乃太平之象士為四民首講誦不輟為衆人倡
不亦可乎邑有姊妹二人抗賊死為拜其塚祀以少
牢鄉民王錫引有孝行造其廬而禮之郊教被寇民

器然不樂生貞佐以太平之治治之士民胥悅明年
二月自成復來寇貞佐集衆死守顧王家者仁和人
既撫賊秩滿當遷汝人以其才言於上官留之至是
亦在城中助貞佐守禦甚力賊勢盛城竟陷貞佐走
拜其母曰兒不忠不孝陷母至此罪通於天有勸微
服道者曰偷生苟活安施顏面賊執之去大罵見賊
殺人厲聲曰驅百姓困守者我也安殺何為賊割其
舌支解而死母喬氏亦死友人王昱相隨不去賊義
之昱收葬於郊南郊每歲寒食郊人傾邑祭奠廣其
塚至二畝餘贈河南按察僉事王家亦大聲叱賊賊

亂刃砍死賊盡戮鄉人王家子國誘賊至墟墓間發
藏金用巨石力擊賊碎其體而死汝州所轄凡四縣
寶豐魯山二特並陷其令張人龍楊呈芳亦以節著
人龍遵化人賊陷寶豐不屈死妻年少家奴四人欲
亂之妻飲以酒俾極歡而潛遣婢告丞尉勒兵捕殺
之乃扶視旋里呈芳山海衛人知魯山撫字有恩練
總唐思鸞潛結黨衆與進士宗麟祥諸生袁熊瑞等
謀不軌呈芳捕斬之至是城陷死焉有孔貞璞者曲
阜人知伊陽縣賊薄城以守禦堅解圍去他日有事
汝陽道遇賊被執亦不屈死

周小厝陳心學皆歙縣人心學鉉授知縣不謁選而
歸卜厝舉崇禎三年鄉試知內黃以父喪旋里十五
年李自成陷歙縣執心學欲官之不從被殺更問小
厝如何曰吾以母老在此若欲仕何故里居自成曰
汝不願仕何以官內黃曰爾時父在母未老也今母
老多疾安得舍之而官自成曰既不願仕為我執縣
官果可代汝死曰哉人以利己仁者不為也自成怒
遂殺之有李得筭者寶豐舉人城陷得筭短衣雜衆
中為賊小校所執徒跣縲絏賊時以牛金星為謀主
金星常舉於鄉勸賊重用舉人故賊所至即搜求舉人

官之或勸得苟自言不聽賊役使之又不從伺賊寨將刺殺之其婦大聲叫呼賊覺乃被殺有語賊者曰此舉人也賊懼得罪棄其屍莫知處所扶溝劉恩澤亦舉人慷慨能任事嘗以策干當道多見納用十四年十月賊逼扶溝衆議城守而縣令駢不解事恩澤座中蹶起痛哭曰吾不幸從汝曹木偶以死自題樓壁曰千古綱常事男兒肯讓人明日城陷墮樓而死時華人盡節者有南陽張鳳翔王明物洛陽張氏表采城夏云醇商城余容善光州王者瑄光山胡植嵩縣王翼明並以罵賊被難云

何燮字中理晉江人舉於鄉歷知靈山桂東二縣崇
禎中為亳州知州州自八年以後流寇土寇交橫益
以饑饉居民死徙過半燮至盡心拊循經營戰守具
甚備未幾山東河南土寇迭至燮勒兵戰於盧家廟
衆爭奮生擒賊魁李忠常顯吾戮之剗其脇以示衆
餘賊潰散撫降李龍等數千人十五年二月李自成
陷河南諸州縣遠近震恐居民盡室而逃城中空虛
不能守遂陷賊執燮欲降之漫罵不屈賊斷其足割
其胸而死懸首市上三日耳鼻猶動衆相顧駭愕賊
遂縱兵四出霍丘霍壁野昭皆陷先是八年春賊已

陷霍丘至是再陷知縣左相申德衛兵巷戰力屈被
執死之廵簡吳姓者格開死靈璧知縣唐良銳全州
人由乙榜入仕賊至城守力不支城陷抗罵死盱眙
先已被陷至是賊再來冠士民悉走主簿胡淵獨效
死不去或言君非正官盍避諸淵正色曰吾亦守土
吏可偷生耶縣故無城持戰至龜山寺與賊力鬪殲
數人賊駭異欲遁會馬蹶被執奮罵而死淵永年人
起家貢生

趙興基雲南太和人舉於鄉崇禎中為廬州府通判
先是賊賀一龍左金王等五大部分據英霍二山鈔

掠遠近署作而入秋高而出歲以為常山城長吏挈
其印視事舟中或濱江洲渚邑居聚落荒梗無行人
督師楊嗣昌常遣監軍僉事楊卒然招之受侮而返
至是李自成張獻忠大亂中原一龍等遙相響附勢
益張以十四年六月襲陷英山縣知縣高在崙抗賊
死十二月陷潛山知縣李孕嘉典史沈所安遣督賊
村中奸民惡其苛急填賊執之二人並不屈死所安
之子亦死焉十五年獻忠為左良玉所敗走合於諸
部遂以三月攻舒城踰月城陷改為得勝州據之遣
其黨分掠旁邑游騎日抵廬州城下興基與知府鄭

履祥經歷鄭元綬合肥知縣潘登賢指揮同知趙之璞在籍雲南右叅政程楷分門而守監司蔡如蘅貪戾民不附賊謀者滿城中亦不知五月提學御史徐之垣以試士至獻忠道其下偽為諸生囊書挾筆襲儒衣冠以入端三下賊從中起城上舉砲應之城中大擾之垣如蘅及履祥登貴並縋城走與基時守水西門聞變挺刃下戍樓與賊格鬪斬數人被創死元綬楷共守南薰門元綬力鬪死楷不屈死之璞分守東門巷戰死賊乘勢連陷含山巢縣廬江及無為六安二州又陷太湖知縣楊春芳典史陳知訓教諭沈

鴻起訓導委懋獲並死焉廬州城池高深八年春賊
百方力攻知府吳大樸迄堅守不下後屢犯終不得
志至是以計得之履祥登貴懼罪委之與基總督史
可法按問諸生胡來化毅然曰失城者守令非別駕
也因其死而誣之何以慰忠魂且何以勵生者來化
與別駕生死異途無所要結可法義之降階長揖以
其言上聞乃治兩人罪而贈與基河南按察僉事楷
光祿寺卿元綬亦獲贈恤方賊之攻舒城也縣令適
以憂去在籍編修胡守恒與遊擊孔廷訓督民兵共
守守恒家富而為人貪吝鄉里怨之至是餉乏廷訓

及士民稱貸再三堅拒不應兵退齊怨會廷訓縱所部淫掠士民逐之遂叛降於賊黨賊力攻城將陷悍卒疾守恒者剗刃其腹而死朝中不知以為殉難也超贈少詹事諡文節

婁統春字元文桐城人為諸生慷慨有才志以翰賢入國學用保舉授黃陂縣丞常攝黃安黃梅二縣事並著廉能聲十五年賊犯黃陂統春已遷涪州判官朱赴乃督衆乘城拒守凡十五晝夜賊忽解去統春號於衆曰此懈我也不可忽然衆已疲極歸休於家閏五日賊果突至城遂陷統春猶巷戰力竭被執賊

欲屈而用之。統春指其魁大罵賊，怒斷其右手，復以左手指賊罵賊，又斷之。罵不已，乃割其舌，剗其目，猶以頭觸賊，遂支解之。有薛聞禮者，武進人，初為府吏，善於其職，上下交稱之。後官黃陂，典史值歲歉，民逋漕粟，聞禮奉使過漢口，貸於所知，得千金以代民逋。十六年，張獻忠陷黃陂，愛聞禮才，欲重用之，扶與俱去。暮即亡歸賊，設偽官，士民競起殺之。聞禮曰：「禍大矣！今之遠避而已，獨留以當之，俄賊至，將屠城。」聞禮挺身曰：「殺官者我也，士民無預，請殺我。」賊猶欲活之，聞禮罵不止，乃見殺。當是時，賊延萬、仲、原、履、名、賊不可

勝數然迄無降賊者其以小吏死難有何宗孔賈儒
秀張達郝瑞日諸人宗孔官紫陽典史十一年五月
流寇再陷其城死之儒秀官商南典史賊陷城抗節
而死達為興山典史十四年二月張獻忠自蜀來攻
都司徐日曜戰沒達被縛罵賊不屈支解死瑞日陝
西人為周始朱華鎮巡簡勇敢負氣節羅山為賊所
陷止官令瑞日攝其縣事乃單騎攜二童以往至則
止於僧寺將招流移為守禦計未逾月賊遣偽官至
土寇萬朝勛與之合誘執瑞日說之降不從拘留其
家一日朝勛置酒宴群賊酣醉而卧瑞日潛入其室

殺之將奔鳳陽為大雨所阻復見繫賊愛其勇欲留之叱曰我雖小吏亦朝廷臣子肯為賊用耶遂被殺二僕亦死有朱耀者固始人與父允義二兄炳思成並以勇力聞八年賊來犯耀父子力戰却之明年賊復至耀出戰手馘賊數十級進之陷伏中為賊所獲大罵死允義曰我必報子誓炳謂思成曰我二人必報弟誓三人率衆奮擊賊解去城獲全

魯世任字媿尹垣曲人性端方事親孝聞安邑曹于忭倡道其鄉從之受業又與絳州辛全交學日有聞乃撰問述贊自奮盟二篇矢志實錄錢天啟末舉於鄉

崇禎十年為鄭州知州善政大著建天中書院集士
子講肄其中遠近聞風樂從者幾千人十三年秋給
事中范士髦薦世任及臨城諸生喬已百內丘故太
原通判喬中和於朝稱為德行醇儒堪繼薛瑄陳獻
章之後乞召試平臺置之左右倚顧間時不能用十
五年流寇來犯親勅民兵禦之河干衆寡不敵力戰
敗績自刎死士民聞之奔走哀號肖像祀之天中書
院其年正月賊陷襄城總督汪喬年死之知縣曹思
正被殺典史趙鳳才拒敵死訓導張信罵賊不屈遇
害未幾陷西華知縣劉伯驥懷印投井死明年記水

隋知縣周騰蛟亦死焉伯驤河間人由歲貢生入仕
平刑輕役興學重農得士民心賊信急遣妻奉母還
家為防禦計及賊薄城有勸出降者立刃之登陴死
守賊驅其下為十覆迭進環攻城遂陷伯驤死之士
民立廟以祀騰蛟香河人起家乙榜時頻歲寇警加
以凶札民不聊生騰蛟撫字有術以其間釐定徭役
每里均為二百四十頃甲均為二十四頃民甚便之
城孤懸河畔縣人吳邦清等於城南立七砦相犄角
中摩天砦為最險土寇李際遇伺騰蛟往河北急攻
破摩天砦據之遂攻縣城且沿河設守阻遏援軍騰

蛟聞力請於上官以副將卜從善兵至賊始解去勝
蛟念故城難守遷縣治于摩天砦以拒賊衝未幾賊
大至相持十餘日賊多死傷其後隊來益衆勢不能
支砦臨河可渡以免勝蛟曰吾何忍舍衆而獨生遂
自投於河賊退人從河濱獲其屍肘間猶懸印焉
劉種字誠吾中部人從高祖聰順天巡撫高祖璋霸
州知州祖仕刑部郎中以爭大禮廷杖後定李福達
獄下吏遣戍穆宗起太僕少卿年老不就父爾完歷
商丘名山知縣有學行種性剛介事親孝母沒於名
山四千里哀號扶櫬遇刻關雲棧以肩任之父少寐

愛聽史記裡、每夕朗誦俟父熟寢乃已崇禎四年
賊陷中部裡負父避難秋霖水漲渡者多溺裡獨無
恙十四年由乙榜授登封知縣土寇李際遇申堵邦
據山為亂裡練壯士數百與同甘苦且守且戰寇不
敢近十五年李自成陷其城裡被縛自成以同郡故
欲降之裡叱曰豈有奕世清白吏肯降賊耶自成曰
吾與若同鄉今方有事閨中曷與我共事裡終不屈
自成義之明日遣賊將來說反覆數百言裡執志彌
厲乃見殺贈按察僉事同時陳顯元由鄉試副榜授
新安知縣值大亂之後撫之以恩惡衣糲食與齊民

等或徒步咨民疾苦饑寒者輒衣食之徭賦繁重教
為民請命尋以城堞傾頽寇至必不能守率士民入
保關門寨賊屢檄說降立碎其檄及賊衆來犯死守
月餘力竭而陷見賊怒罵賊大殺寨中人屬聲曰守
寨者我也百姓何辜寧磔我勿殺百姓賊益怒顯元
益罵遂支解而死是時流寇之亂河南最劇故其死
事者最多巡按御史蘓京奉詔錄上凡二百四十有
九入後所傳不及百人蓋武職及州縣末秩舉貢諸
生所遺逸者幾十之五六云

王世琮字仲發達州人天啓四年舉於鄉崇禎中為

汝寧府推官等出討屬縣土寇流矢貫耳而不動時
號王鉞耳上官薦其才請即用為兵備僉事分巡其
地吏部乃用之冀北道御史潘世奇言世琮以知兵
超擢不當移之善地詔復還之汝寧十五年九月李
自成既覆開封尋敗孫傳庭於邙縣再陷洛陽南陽
遂以閏十一月來犯時總督楊文岳在城中世琮與
之力守未幾城破被執厲聲大罵賊怒用砲擊殺之
一時全死者知府傅汝為通判朱國寶汝陽知縣文
師順三人汝為字子宣江陵人崇禎七年進士歷知
秀水歸善二縣遷南京兵部主事十四年來為知府

繕城治器日夕儆備數與文岳控賊兵後知城不可
保語其妻子曰吾家世受國恩既不能殲賊報主何
復惜此頂踵但上有八旬老父汝歸為我奉養吾死
瞑目矣城陷赴北河死國寶成都人師順全州人並
起家乙榜師順蒞任甫三日竟與國寶全殉河南所
轄凡八郡其三在河北者自六年蹂躪後寇不再犯
其南五郡十一州七十三縣靡不殘破有再破三破
者乃至城郭丘墟千里榛莽人民百不存一賊無所
剽掠棄之而肆毒於湖廣朝廷亦不復設官間有設
者不敢至其地選寄治於他所其道黎僅存者率結

寨山澤以自示多者數千小者數百最尖者洛陽李
際遇汝寧沈萬登南陽劉洪起兄弟各擁衆數萬旋
地稱雄而諸小寨悉歸之或附賊或受朝命陰陽觀
望於其間獨洪起常官副總兵頗稱恭順其後諸人
自相吞噬兵革仍不休中原喪亂於斯為極至十六
年四月帝特下詔蠲五郡田賦三年又制諭汝洛鳩
壁諸人若等迹似弄兵義存報國宜赦罪立功大申
討賊斬偽官者授職捕賊徒者資金獲城獻俘者不
次擢用然事已不可為矣